

E i testimoni l'ero
 Fabian, Gervas e Pero,
 Simon e Toni 'l gnero,
 Tibursi con Genar.

E chi vorrà nen cherde
 Ch'a sia ansinuà
 Ch'a vada pur a vede
 Ant la comodità.
 Ch'a deurva coul armari,
 Ch'a lesa coui scartari
 Ch'a servo al tafanari,
 L'è tut li registrà.
 Pr coui ch'a sento lese
 Cousta disposission,
 A se lassasse arese
 D'lasseje soa porsion;
 L'è staita generosa,
 L'ha feita da grandiosa,
 D'una cavia rognosa
 Ch'ai serva pr stopon.

**Barba Gironi e Slanfrinaia sua moglie, che
 dopo 30 anni di matrimonio hanno avuto
 un figlio maschio.**

CANZONE XV.

L'ha una goi Barba Gironi,
 Ch'a fa d'saut com' un cravieul,
 Sui trant agn d' so matrimoni
 Finalment a l' ha avu un fieul.
 Sui trant agn, ecc.

- Pr piasi ch' loli j' ha faje,
 (L'è sta un rie da cherpè)
 An sautand l' ha sciancà l' braje,
 Ch' ai son drochaie giù sui pè.
 An sautand, ecc.
- Oh! che bele trèbaudete,
 Ch' a j' an faje i seu vsin
 Con le mole e le palète
 Sui paireui e sui bronsin.
 Con le mole, ecc.
- A j' an fait una sparada,
 Ch' a smiava giust d' mortrat,
 Ma l'è stait una sarnada,
 Faita a forsa d' rut e pat.
 Ma l'è stait, ecc.
- A sa nen cosa ch' a s' fassa,
 Tant as treuva conturbà,
 Basta di ch' a l'è andà an piassa
 Senza braje con la spa.
 Basta di, ecc.
- Ai sforgionna d' panadasse
 Minca poch ant un concat
 Dle pi bonne e dle pi grassè,
 Faite tute al breu d' sampat.
 Dle pi bonne, ecc.
- A j' ha già massà una pola
 Ch' a l' avia quindes agn;
 Ma pr fè berbotè l' ola
 L' ha brusà fin i cavagn.
 Ma pr fè, ecc.
- L' ha fità la soma d' l' osta
 Borgna, sopa e senza dent,
 Pr mandè 'l sotror an posta
 Dene part ai seu parent.
 Pr mandè, ecc.

Son vnu vesti da festa

Tuti quanti a fèje onor

Sensa cause e nen an testa,

Scarpentà com' d' sfrosador.

Sensa cause, ecc.

Ogni d' un a s'è studiasse

Pr porteje quaich present,

Chi d' povron e chi d' lumasse,

Chi d' faseui, chi d' pom rusnent.

Chi d' povron, ecc.

Slanfrinaja s'è godusse,

Ch' a l'è peui la pajolà,

Gnanch pr seugn s'era cherdusse

D' vedse a fè tante onestà.

Gnanch pr seugn, ecc.

A j'è 'ndaje doe ciorgne

Pr baileje coul fieulin;

Una l'ha le pupe borgne,

L'otra l'è senza mimin.

Una l'ha, ecc.

Venta vede pesse e fasse

Travajà con tuti i fioch,

Con tre teile da pajasse

Ch' a l'ha tajà an tanti toch.

Con tre teile, ecc.

L'ha dait man a un pajra d' braje,

Ch' a portava ai di d' lavor,

S'è angignasse, a j'ha desblaje,

L'ha gavane un cuvertor.

S'è angignasse, ecc.

Con so spirit s'è butasse

Pr voleje fè un cunot,

E talment a s'è aplicasse,

Ch' a l'è riusci a fè un sebrot.

E talment, ecc.

A s'è piasse pr compare
 Messè Giors 'l cartonè,
 Con Argnasca pr comare,
 La cugnà del tarponè.
 Con Argnasca, ecc.

La marinna j' ha portaje
 Un scufiot dij pi famos,
 Basta di ch' a j' ha costaje
 Una bonna pugnà d' nos.
 Basta di, ecc.

Con la torcia d' sira giauna
 Già scrussia a tut andè,
 Ma gropà tut giù con d' cauna,
 Son partisse andè a batiè.
 Ma gropà, ecc.

Quant al nom a son consultasse
 Quand a l'ero pr camin,
 Finalment a son concordasse
 A buteje nom Martin.
 Finalment, ecc.

Tut 'l mond prli surtia
 A buchè sta procession,
 E Gironi s' n' andasia
 Reidi e fier com' un piston.
 E Gironi, ecc.

Una ciabrassà paria
 Dalla sima fin al fond
 Ant coul leu s'è mai sentia,
 Gnanch da peui ch' 'l mond l'è mond.
 Ant coul leu, ecc.

L' Arsiprete ch' a l' ha batialo
 L' ha tirà sua stocà apres,
 Messè Giors l' ha regalalo
 D' una pessa d' doi e mes.
 Messè Giors, ecc.

Ela pa una bela strenna
 Ch'a l'ha avu la pajolà?
 Una tasca bela e pienna
 D' castagne brusatà.
 Una tasca, ecc.

Ma senti fra j' aitre mance
 Coula li dla levatris,
 A j' an daje senza ciance
 Da compré una lira d' ris.
 A j' an daje, ecc.

Coul ch'a l'ha portà la torcia
 L'ha pa fait so viagi an van,
 L'ha pa avu una strenna splorcia,
 Ch'a j' an dait na mica d' pan.
 L'ha pa avu, ecc.

Ma vnoma a le batiaje
 Pr senti quaicosa d' bel,
 Quanta roba ch'a j'è staje
 Tut parià s' un gran tinel.
 Quanta roba, ecc.

Prima a fur na bela ambosta
 Tra luvìn e tra ravot,
 Ch'ero acomodà an composta
 Con d' cocomer e d' cossot.
 Ch'era acomodà, ecc.

Peui na bela polentassa,
 Ma tajà tuta a listin,
 Ch'a fasio una minassa,
 Ch'a smiavo d' bescotin.
 Ch'a fasio, ecc.

Lo ch' l'ha fait goi a la brigada
 L'è stait un mas d' bei ravanat,
 Con un bel gaviot d' salada,
 Tuta d' pleuje d' fasolat.
 Con un bel, ecc.

Peui a l'an mandà a l'ostaria
 Pr fè portè un bocal d'vin,
 E la festa l'è sta finia
 Dop aveje cimpà bin.
 E la festa, ecc.

**Matrimonio delle figlie di Lucrezia
 Gelofrada.**

CANZONE XVI.

Scotè, se pur v'agrada
 Sta bela novità:
 Le fie d' Gelofrada
 Son tute arcapità.
 Sotrà ch' l'è stà la mare
 S'è manegià 'l pastis,
 Tra amis e tra compare
 Pr deje dunna ardris.
 Da peui che poch pr vota
 S'è spatarà la vos
 D' coula bonna dota,
 E coul fardel famos;
 Sentì, com' a marciava
 La fior dla gioventù,
 E ognun a procurava
 A feje servitù.
 Vedend loli, a l'an butà
 Su j' arie del folat,
 E tute tre a son restà
 Seriose come d' pat;
 A penna a salutavo
 Dla testa o con la man,
 Ma nen s'ancomodavo
 D' aussè coul fabrian.